

西北民俗文獻 第三卷

中國西北文獻叢書



中國西北文獻叢書·第四輯

西北民俗文獻

第三卷



新學堂
PDG

目錄

西徵續錄

清 孫希孟

三

新疆禮俗志

清 王樹枏

二〇三

新疆小正

清 王樹枏

二五九

榆塞紀行錄

清 漁者

三三一

西征續錄

西征續錄上卷

壽州孫希孟著

光緒三十二年十月十五日 自鄭州登車軌路至
鄭北趨渡河汴洛西潼甫經勘定中國自粵漢收
回川浙贛皖爭謀創造而內則蘆漢握於比人膠
濟握於德人津榆滬甯握於英人外則法占滇粵
日占東清俄之西伯利亞幹路假道吉黑以抵琿
春復欲北由恰克圖越蒙古以達張家口西由浩
罕越喀什噶爾以達嘉峪關虛聲囑喝政府雖以
中國自修空言抵禦然亦謀於伊塔烏科諸城練

兵備患故非鐵路運掉不靈計由西安抵伊犁七千餘里為費即須七千餘萬中國寶無此力然如合陝甘新疆三省分年分段逐漸興修先由部提款若干萬於蘭州設立三省鐵路公司總銀行一所以資創始勘工一切經費除本省紳富集款若干外另募股分不拘中外週息五釐二十年清還俱由總銀行擔認人知存款有著而獲一定利益必漸踴躍爭先其勘路分四大段西安至蘭州為一段蘭州至肅州為一段肅州至哈密為一段哈密由南小路至迪化為一段西安至肅所經皆州

縣鄉鎮有設站之地有停貨之場四大段中又分
為若干小段修成一段之工東南商賈百貨逐漸
流通即可獲一段之利再以前段所獲餘利接修
後段之工計二十年中全路可以成立近日張綏
鐵路即津榆餘款俄之西伯利亞亦係貸款始年
運貨十九萬一千餘噸兩年驟增至六十萬六千
餘噸來往客商始年二十四萬八千餘人兩年驟
增五十一萬二千餘人進步發達如此其速且所
經皆荒垠絕漠停頓處所已盡變為繁盛市場此
路祇嘉峪關抵哈密中隔戈壁八站哈密迤南西

抵木壘河中隔嶺路十站約共一千六百餘里亦無高山大河餘皆人烟湊集之區視西伯利亞軌路遠近難易有判然者去年俄之塔什干總督行文新疆擬安站車直抵嘉峪為聯中丞所阻而止然其窺伺日深詭謀難遏此路實有不能再緩之勢否則不但新疆難保即甘陝亦恐入其範圍中矣司國計者其審諸十五里出西寨門車行溝中兩岸土壤壁立高或百尺低亦數丈即楚漢所劃分界之鴻溝也又三十五里至二十鋪宿是日共行五十里

十六日 二十里至滎陽城周七八里土厚墉高形
勢極壯即漢之滎陽爾雅釋水其川滎洛今滎水
已湮又四十里至汜水仍行溝中鄭共叔請制與
京鄭伯曰制巖邑也他邑唯命即此蓋制已近周
故鄭伯惡之恐叔段得寵於天子耳是日共行六
十里

十七日 晨渡烏沙河二三里許入溝兩坡夾峙中
有闕門甃甃遺址土人謂即虎牢凡越小嶺五重
過鞏關三十五里至老犍坡中州平陸千里此為
西上第一重險要或謂鞏關迺漢之虎牢關也坡

上下斗甚馬喘息增駕始行又三十里至鞏縣春
秋有鞏成公又有鞏伯蓋畿內諸侯城東有杜工
部祠舊唐書杜甫鞏人故聞官軍收復河北詩喜
得還鄉有直下襄陽向洛陽之句蓋生於鞏而後
移於襄耳又二十五里渡洛水洛水遶城北入於
河入冬勢微一葦可杭越洛沿北邙南趾洛水北
岸行又十八里至孫家灣宿是日共行一百八里
初議蘆漢軌路由漢口西行沿襄樊南陽抵北邙
山建橋渡河根基易立後以道路紆折始改由許
鄭而北也

十八日 早行十七里至偃師縣即古南亳出城遙
見嵩嶽矗立雲表初陽軒豁蒼翠極天紫蓋天柱
太室少室諸峯參差羅列其方削如壇疊立如屏
者是為中峯白雲紛披如絮如氈須臾間彌滿山
谷羣峰盡隱遂驟馬而馳余昔三過泰華北涉恒
山之麓海內名山經過十數都未登陟平生柱著
幾兩屐視霞客輩媿死矣又四十五里至義井鋪
尖洛偃分縣駐此又四十五里至河南府庚子西
狩時有遷洛遷襄之議然洛陽四戰之地襄又僻
處一隅異日備巡終以西安為上蘇子瞻云周之

失計東遷為甚此亦追咎之論魏之遷洛遼之遷
燕以圖中國周以狄難而遷岐殷以河患而遷耿
國之存亡在德與政非盡遷之咎也俄羅斯亦屢
遷歐洲列強不得而議之其阻中國也以便其挾
制之私心然中國未失自主內政非彼所能預也
予昔寄瑞學士詩曰青門西畔淚同揮回首長安
事已非東海未聞歸秀吉北庭又報失延徽金盤
露冷愁宵柝鐵牡霜寒恐夜飛今日備巡非晚計
不須輕拂諫臣衣作於丁酉不幸而中今兩雄爭
覬遼東卧榻之間已為他人鼾睡謀國者其毋執

蘇說可也途中得詩三首五嶽名山到已咸勞生
猶是舊青衫吹簫伴侶休相笑不遇浮邱骨已凡
又眼見銅駝九廟荒纖兒撞破識先亡蒼生縱為
甯馨誤祇恨司空負汝王又掃盪秦關百二空寄
奴枉負一朝雄司空只託丹陽重不表遷鑾向洛
中是日共行一百七里

十九日晨出洛陽三十八里至磁鎮尖鎮為春秋
尹國亦畿內諸侯又三十里至函谷關亦曰函谷
新關漢樓船將軍楊僕恥居關外請以己封移函
谷於此故名非秦之函谷關也關在新安城東里

許杜工部有新安卒詩入城井邑蕭條風日淒冷
已近秦邊氣象西過二陵一南一北突兀相望左
傳其南陵夏后皋之墓也其北陵文王之所避風
雨也按元和郡縣志東嶠至西嶠三十五里在秦
關之東漢關之西是秦關故址亦在此間矣一路
山徑紆折水石雷礧涉澗水三四次車馬皆瘖又
三十里至鐵門宿得詩三首講藝投戈又一時橫
行臧馬已堪嗤龔生高潔嚴陵傲獨怪梁鴻賦五
噫又坡陀漸入萬山叢高華靈光一脈通欲跨玉
龍朝白帝更無紅拂識英雄又馬覆車債賴僕堅

一尊婦孺話燈前為卿更誦嘉州白尚有涼州亂
石川是日共行九十八里

二十日 二十里過小堡顏曰董公倡義處蓋遮說
高祖為義帝發喪者又四十里至澠池縣秦趙會
處城西百步許有會盟店漢馮異破赤眉於嶠底
亦此地車中得二絕句三老鄉亭近古風力田孝
弟詔還同暴秦縱是愚黔首大義猶能說董公近
時議立憲設鄉官蓋近漢制又晚柱終成返壁功
還將趙瑟敵秦雄一推博浪今何世海外驚聞說
是公俄主遇弒歐洲刺客甚熾亦戰國之風也途

遇英商購羊毛數十車東去西人廣收中國駝羊
雞鴨等毛製為氈毯巾扇轉售中國實亦一大漏
卮陝撫議設皮毛公司英商嗾其駐京使臣尼之
而止中國利權非西人所能預伊犁將軍馬亮亦
奏設皮毛公司俄人不敢問也聞甘肅涼州西甯
產毛極夥津滬商人由歸包草地入邊收買捆載
而東運出海外歲值三四百萬金為出口之一大
宗左文襄督陝時購買機器自製絨呢旋以無利
而止近升制軍復設織局所織綢緞大呢本貴價
昂積滯難售亟宜選聘工師設法改良但使成本